



國家清史編纂委員會・文獻叢刊

清代詩文集彙編



國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 六七三

劉武慎公全集二十九卷首一卷 劉長佑 撰

劉武慎公遺書首卷目錄

劉武慎公全集卷一

上諭三道

諭賜祭文二首

御製碑文一首

國史本傳

待刊

禮部奏請

子諡摺

閣鈔

湖南巡撫代遞遺疏摺

湖南巡撫覆奏查明子孫片

劉武

慎公全集

目錄

廣西巡撫請建祠摺

江西巡撫請建祠摺

湖南巡撫奏請新建祠摺

湖南巡撫奏立功地方建祠摺

神道碑

待刊

墓誌銘

待刊

總目

光緒十三年八月十四日內閣奉

上諭前任雲貴總督劉長佑持躬端謹辦事老成由拔貢生效
力戎行勦辦廣西江西湖南湖北安徽等省賊匪迭著戰功
洵堪監司旋膺疆寄歷任兩廣直隸雲貴總督於地方事宜
盡心籌辦克稱厥職前因患病準其開缺回籍調理茲聞溘
逝軫惜殊深劉長佑著加恩照總督例賜卹任內一切處分
悉予開復應得卹典該衙門察例具奏該故督有無子嗣著
卞寶第查明具奏候旨施恩用示篤念盡臣至意欽此

劉武慎公全集

卷首

諭旨

光緒十四年 月十二日內閣奉

上諭卞寶第奏查明劉長佑子孫遵旨覆陳等語前雲貴總督劉長佑之子通判劉思謙著加恩以同知用伊孫光祿寺署正劉繩武著加恩以主事用欽此

光緒十四年正月二十九日內閣奉

上諭李秉衡奏已故撫臣戰功卓著遺愛在民請建立專祠一摺前雲貴總督劉長佑在籍病故業經降旨賜卹該督於咸豐同治年間兩任廣西巡撫剿辦賊匪所向克捷殲除夥匪綏靖邊疆其於地方各事宜興利除弊亦能殫心經理洵屬勛勞懋著遺愛在民加恩着在廣西省城建立專祠以彰蓋績該部知道欽此

諭賜祭文

朕惟雲興衡嶽應時生敵愾之材星落瀟湘盡瘁失折衝之選溯武功於曩日吉協師貞緬政績於當年寵頒異命允備飾終之禮宜優設奠之恩爾原任雲貴總督劉長佑直清勵品篤業據忱早登拔萃之科遂切從戎之志墨磨盾上運籌於量沙聚米之時雖脫囊中草檄在鞠旅陳師之會劉太尉順昌之捷大都功出書生謝冠軍淝水之勳屢說策由謀主經畧既欽其偉績鸚鵡頻登朝廷亦嘉乃殊勛鴈班屢晉吳頭楚尾疊奏膚功陳臬開藩恆邀心簡既而櫓槍盡掃盤石重安荷

劉武慎公全集卷首 諭賜祭文

四

先朝特達之知畀開府封圻之任雖臬匪之縱橫未靖暫失機宜而狼氛卒殄滅無遺深堪嘉尚迺移旌於薊北旋建節於滇南露湛九霄風清六詔一路有福星之頌四郊興甘雨之歌方圖治以宣猷忽積勞而邁疾俯俞靜攝冀得早痊暫免馳驅長資倚任而乃壺頭瘡痍馬援之矍鑠都非峴首淒涼羊祜之風流不再淪殂遽告悼惜良深加異數以酬庸念壯猷而賜奠悉蠲除夫往咎仍延賞於後昆於戲精爽猶存百戰壯旂常之色恩榮永被千秋流拒鬯之芳惟爾有靈尙其歆受

諭賜祭文

躬膺重寄籌謀悉本乎忠忱禮尙殊施崇報難忘乎偉績蓋論功以經邦爲大而眷舊以錫奠爲隆爾原任雲貴總督劉長佑柱石勛高棟梁望重遺艱投大慰深宮宵旰之塵戮力同心定全局安危之策歷始終而勤事爲中外所交推茲當

歸政之期特重

酬庸之典沛

鴻施於此日溯駿烈於當年

溫綵優頒嘉筵式錫食俎豆升香之報煥旂常載績之光於戲聚

劉武慎公全集卷首 諭賜祭文

五

米量沙猶憶長操勝算陳羞設醴允宜藉咎殊勛靈而有知爾其來格

御製碑文

朕惟經文緯武端資柱石之臣崇德報功式煥絲綸之色而況受

三朝之知遇尤宜沛九陞之榮施實紀青珉恩頒紫誥爾原任雲貴總督劉長佑賦質剛方持躬謹愨榮分貢樹早躋司鐸之班暢曉戎機時切請纓之志上攻心之妙策攄豹畧而兵下三吳呈繫頸之奇謀展龍韜而威申兩楚佐裴度功成淮蔡繼開平底定和滁勤訓練則士無二心著聲威而獨當一面卒使長江鐵鎖難當王濬樓船滿地金戈莫抗太真羽扇薦章屢上懋賞頻仍以牧令而存陟監司由臬藩而晉躋開府

劉武慎公全集卷首 御製碑文

六

靖狼氛於江漢翠羽榮加權虎節於封圻丹綸寵錫每依北斗爲畿輔保障之良是式南邦慰滇黔雲霓之望乃以因公負咎旋爲久病交侵效班超之乞身慨廉頗之垂老朕加恩宿將篤念耆年憫厥勤勞俯俞調攝胡引疴之未久竟奄逝之遽聞箕尾雲封歎忠魂之不返旄頭星殞知毅魄以如生爰推卹後之恩用錫易名之典諡曰武慎表厥生平於戲馬鬣風懷雁戶切甘棠之念龍綸日麗螭碑增宰樹之輝式勒貞珉永垂冊府

禮部謹

奏爲請

旨事光緒十三年八月十四日內閣奉

上諭前任雲貴總督劉長佑持躬端謹辦事老成由拔貢生效力戎行勦辦廣西江西湖南湖北安徽等省賊匪疊著戰功洊擢監司旋膺疆寄歷任兩廣直隸雲貴總督於地方事宜盡心籌辦克稱厥職前因患病準其開缺回籍調理茲聞溘逝軫惜殊深劉長佑著加恩照總督例賜卹任內一切處分悉予開復應得卹典該衙門察例具奏等因欽此欽遵鈔出到部臣等查定例內開一品官病故

劉武慎公全集卷首 禮部奏摺一

七

恩予卹典者給與全葬銀五百兩一次致祭銀二十五兩

遣官讀文致祭應否予諡請

旨定奪凡有子諡者內閣選擬諡號工部給碑價銀三百五十兩本家自行建立祭文碑文交翰林院撰擬不予諡者祭

文交內閣撰擬等語今前任雲貴總督劉長佑病故欽奉諭旨加恩照總督例賜卹照例給與全葬銀五百兩一次致祭

銀二十五兩

遣官讀文致祭祭文交該衙門撰擬其應否予諡之處伏候

欽定恭候

命下臣部行文各該衙門遵照辦理爲此謹

奏請

旨奉

旨著予諡欽此

劉武慎公全集

卷首

賈欽奏摺二

八

內閣鈔出前往雲貴總督劉長佑諡號奉

硃筆圈出武慎欽此

計開諡法

折衝禦侮曰武剛強以順曰武

小心克勤曰慎夙夜敬畏曰慎

劉武慎公全集

卷首

開鈔

九

湖南巡撫臣卞寶第跪

奏為在籍大員病故代遞遺疏仰祈

聖鑒事竊前任雲貴總督劉長佑於光緒九年赴都

陛見因病奏請開缺奉

上諭準其開缺回籍調理俟病痊後仍著來京陛見欽此茲於

光緒十三年六月二十五日在湖南新甯縣本籍病故據

該家屬稟報將劉長佑遺摺呈請代奏前來伏查劉長佑

由拔貢生於咸豐元年隨同前安徽撫臣江忠源帶勇剿

賊廣西轉戰湖南江西湖北安徽等省五年經前撫臣駱

秉章奏委募勇勦辦本省股匪赴援江西九年擊退石達

劉武慎公全集

卷首 湖南奏摺一

十

開大股髮逆永寶解圍追勦人粵游保記名按察使是年

九月補授廣西按察使升布政使歷任廣西巡撫兩廣總

督同治二年調補直隸總督六年因梟匪滋擾一案部議

革職是年十二月蒙

賞給三品頂戴旋蒙

賞給二品頂戴十年補授廣東巡撫調廣西巡撫光緒元年補

授雲貴總督九年六月因病開缺回籍調理醫治數年迄

未痊愈該故總督任直隸總督時臣官順天府尹其事三

年深知其廉正忠勤整飭吏治起用為雲貴總督該故

總督感

恩圖報倍矢精勤兵燹之餘力求培養軍民愛戴邊徼綏安在

籍養病猶時以國事為念忠悃始終如一茲聞溘逝實堪悼惜謹將該故總

督遺摺一件附摺呈遞伏乞

太后

皇上聖鑒訓示謹

奏奉

硃批另有旨欽此

劉武慎公全集

卷首 湖南奏摺一

十一

湖南巡撫臣卞寶第片

光緒十四年五月二十二日具奏

再臣前準吏部咨開內閣鈔出光緒十三年八月十四日奉

上諭前任雲貴總督劉長佑持躬端謹辦事老成由拔貢生效力戎行勦辦廣西江西湖南湖北安徽等省賊匪迭著戰功洊擢監司旋膺疆寄歷任兩廣直隸雲貴總督於地方事宜盡心籌辦克稱厥職前因患病準其開缺回籍調理茲聞溘逝軫惜殊深劉長佑着加恩照總督例賜卹任內一切處分悉予開復應得卹典該衙門察例具奏該故督有無子嗣着卞寶第查明具奏候旨施恩用示篤念盡臣至意欽此欽遵

劉武慎公全集

卷首 湘撫片

主

當即行查去後茲據署新甯縣知縣張葆運申據該家屬呈稱劉長佑長子思詢道銜甘肅候補知府因目疾請假回籍調理現在尙未就痊次子已故三子思謙二品廕生考試二等奉

旨以通判用四子思訓兵部候補郎中出繼堂叔長偉爲嗣有孫九人長孫繩武附貢生報捐光祿寺署正次孫永澥附生餘俱年幼所有查明故總督劉長佑子孫謹附片覆陳伏乞

聖鑒謹

奏

護理廣西巡撫臣李秉衡跪

奏爲已故前任撫臣戰功卓著遺愛在民請建立專祠以順輿情恭摺籲懇

恩施仰祈

聖鑒事竊據廣西紳士在籍二品頂戴浙江補用道靳邦慶翰林院編修曹馴庶吉士周璜廣東試用道王錫誥三品銜湖南補用知府易鳳儀等以前任廣西撫臣升任雲貴督臣劉長佑功德在粵臚列政績呈請奏建專祠等情前來臣查該督臣劉長佑以湖南拔貢生投筆從戎立功數省士民謳思不輟而粵民之愛戴尤深溯自咸豐九年七月

劉武慎公全集

卷首 粵撫奏摺一

主

髮匪僞翼王石達開由湖南敗竄廣西境內擁眾十餘萬劉長佑以記名按察使奉

命率所部楚勇越境援剿是時僞國宗石鎮吉先以別股撲圍省城石達開自率大股分踞義甯永福爲之犄角城內所恃惟前任布政使蔣益澧所部一軍賊燄既張人人惴恐劉長佑率八營馳抵靈川審機應敵急擣義甯之賊攻其必救賊遂不戰而退城圍立解先是咸豐二年髮逆圍困省城劉長佑由籍募勇來援已解城圍一次至是實爲桂林二次解圍粵西自金田構逆以來賊匪蜂起其大股盤踞城池者柳州則有馮常陳茂養潯州則有陳金剛修仁則

有張高友蔓衍句結不可爬梳各屬州縣城池十陷八九此外著名首匪尙以數十計荆榛遍地民無一日安枕加以兵單饑細艱苦萬狀劉長佑統算兼籌力持危局桂林解圍之後遂督所部進窺柳郡是年九月奉

旨補授廣西按察使旋升布政使仍留營調度諸軍先後克復雒

容柳城等縣並復柳州府城於是各處團練皆得隨營自效是時匪首陳戊養結黨屯於柳城縣屬修築土城勢甚猖獗象州潯州艇匪數百艘乘風上竄與該匪聯爲一氣悉眾圍困郡城劉長佑派各營分路掩擊連破堅巢並焚賊艘郡城圍解象州城池亦督團克復十年四月在營次

劉武慎公全集

卷首

拜升授廣西巡撫之

命回省接篆維時石達開大股竄踞慶遠府城四出分擾遂檄慶遠知府榮林督所屬漢土文武團練分道圍擊斃匪數千進薄城下克之石逆遣眾往攻思恩南甯等府及百色臨城擾及泗城府皆檄飭地方文武督團擊退旣而石逆後旗部眾糾合土匪竄擾羅城融縣及永甯州屬三隍等處派員弁督勇擊走之賊左旗大股隨後踵至復派軍駐防義甯永福各要隘賊乃分股橫竄靈川縣屬潭下圩距省城五十里當率在城官紳嚴密守禦賊不敢犯七月二十五日賊目張志公等數十人皆獻僞印詣營乞降安撫其

劉武慎公全集

卷首

眾派令隨同剿賊由是左旗後旗兩股皆敗竄湖南而桂林全境肅清匪首陳金剛久踞賀縣分擾平樂昭平等縣賊巢林立蔣益澧統率湘軍迭破堅巢廓清平樂昭平境地劉長佑復奏派統領湖南防軍駐紮江華之候選道劉嶽昭越境協剿與蔣益澧分道夾擊收復賀縣城是時梧州土匪羅華觀等踞該府下邳等處窺伺府城乃令蔣益澧移師進擊會合東省水師剿撫兼施肅清沿河一帶而柳城縣屬之悍匪句結石達開散匪益以潯江艇匪大小十餘股水陸蔓延劉長佑分遣諸將以次剿撫於是柳州全境亦就肅清旣而石達開散股賊目彭大甚等自懷遠翻山闖入湖南綏甯城步等縣分擾武岡新甯楚省移書告急劉長佑遂於咸豐十年十月親自督師出省至龍勝廳規畫形勢飭派副將李士恩等率勁旅赴援新甯城自由龍勝沿邊出全州部署完備而回當是時石逆散股各起東奔西竄我軍節節兜剿賊勢窮蹙降者甚眾惟石逆尙踞伏賓州派員會商署思恩府徐引調集勇練分頭進攻將賓城克復乘勝追剿石逆身受重創率其餘孽仍竄楚境從此右江一面乃獲暢安旣又飭派湘楚各軍會同東省水師激勵團練先後克復潯州府及貴縣橫州各城殲除巨逆陳開招撫逆首郭礪溪等潯梧兩屬漸臻安定

左江匪首吳凌雲久踞南甯土忠州咸豐十年八月分黨
襲陷太平府繼陷養利州城土屬地方盜藪充斥劉長佑
遙授機宜派左江練勇攻克各土屬四百餘村遂將太郡
養利兩城收復其荔浦縣屬蓮塘逆首張高友竄踞修仁
陽朔兩城遣布政使張凱嵩候選道易元泰率副將陳友
勝等分兵進擊皆復之同治元年春閒匪首黃三句串匪
目梁贊等及各處潰匪眾約數萬圍犯潯州府城急派都
司蔡其昌率扒船馳赴堵剿又派署右江道蔣澤春統新
募南甯六營繼進元年四月親率五營出省赴潯州督師
迭克堅巢招撫賊目多名破脅數十村同時就撫黃逆之
勢遂孤時已奉

劉武慎公全集

卷首

粵撫奏摺四

六

命擢兩廣總督仍暫留潯調度既屢奉

廷寄催赴新任乃派員總理營務由潯東下自去粵後各匪雖
以次蕩平而地方伏莽猶多或結黨攻剿或尋仇慘殺悉
著名兇悍同治十年劉長佑再來撫粵先後派撥營勇及
地方文武兵團以次勘定又有李青龍以渠魁投誠保至
遊擊猶懷貳志設計誘至省垣訊而誅之是時提督馮子
材駐師龍州剿辦竄擾越南股匪面商審機定策將越匪
次第剿滅留營分駐以固邊圉其戰功卓著靖寇安民者
如此至於整飭吏治激勵團防安戢土司懲創姦宄勤課

蠶桑舉凡興利除弊之事不可殫述又嘗籌款修建桂山
書院舉行孝廉月課改建鎮安府考棚以便士子赴試大
有造於粵西伏查軍興以後凡有戰功卓著遺愛在民者
奏請於立功地方建祠無不仰蒙
俞允劉長佑先後撫粵多年靖寇安民輿情愛戴經該紳等呈
請建祠報享理合臚奏陳請合無仰懇
天恩俯準於廣西省城建立已故前任廣西撫臣
督臣劉長佑專祠以順輿情出自
鴻施謹會同兩廣總督臣張之洞恭摺具
奏伏乞

劉武慎公全集

卷首

粵撫奏摺五

七

皇太后

皇上聖鑒訓示謹

奏

江西巡撫臣德馨跪

奏爲已故樞督重臣功績在江士民思慕不忘請

旨在於江西省城建立專祠以順輿情恭摺仰祈

聖鑒事竊據江西在籍紳士前漕運總督蘇鳳文頭品頂戴前

河道總督梅啟照太子少保頭品頂戴前雲南布政使宋

延春翰林院庶吉士徐兆瀾等呈稱已故大學士左宗棠

於咸豐十年以四品卿襄辦兩江軍務惟時粵逆分數大

股竄犯江西偽忠王李秀成圍玉山廣豐廣信其廣東另

股賊匪陷河口興安德興婺源等處左宗棠領軍至江既

克德興婺源明年正月與霆軍會剿偽堵王黃文金於鄱

陽之洋塘三戰皆捷遂復鄱陽等六縣而偽侍王李世賢

自金陵突圍而出號眾十餘萬驟入鄱陽樂平浮梁景德

鎮列圍二百餘里破我景德鎮防軍凶燄尤張左宗棠憑

樂平縣城浚濠自衛而密伺賊瑕縱擊一月六捷斬賊二

萬賊始鼠浙計半年中縱橫策應七百餘里堵侍二酋侍

其桀黠志在必得江西而卒不能深入則左宗棠之力爲

多也正追侍酋開池州賊目劉官方復陷建德蔓及鄱陽

時前兩江總督曾國藩以鄱陽若失腹地仍危飛咨還救

既復建城旋迎擊闖賊賴裕新於德興大創回竄乃分軍

留守景德鎮自駐婺源解祁休之圍爲江皖全局計迫與

劉武慎公全集卷首江撫奏摺一

大

曾國藩定議援浙念饒廣爲皖浙要衝仍分軍徽祁備警

同治初年堵逆再竄鄱陽與江軍合殄之三年偽涪王譚

逆踞南豐偽康王汪海洋踞東鄉許灣偽侍王李世賢踞

崇仁宜黃皆逼近省垣欲爲金陵巢穴逆退步左宗棠檄浙

軍入城助守隨與江軍分克崇仁宜黃諸城金陵已拔羣

賊上竄浙軍復移駐撫州爲省城捍衛及四年秋汪海洋

竄龍南信豐定南等廳縣浙軍馳驅千里會邀截擊合江

閩粵諸軍盛賊入嘉應州殲焉後督兩江值光緒八年大

水撥銀二萬兩分賑江右災黎更令瀕水圩堤多植梧柚

以護之此則該故大學士左宗棠之始終大有造於江西

者也至已故雲貴總督劉長佑於咸豐三年佐前安徽巡

撫江忠源軍次九江五月賊由金陵汴湖口徑撲江西省

城旌旗蔽江泰和安福土匪復起應之時承平日久驟遭

兵燹人心大震劉長佑衝賊馳入登陣守禦飛書湖南乞

援賊百計環攻一日轟塌城垣數丈悍酋蟻附而上勢極

垂危因然火藥向缺口傾拒隨圯隨築守禦始固七月援

軍至以次平定蓋枕戈待旦者已九十餘日矣嗣楚軍援

皖鄂兩省賊擇近肆擾四五兩年江西淪陷八府五十餘

州縣幾無完土六年正月劉長佑自籍率所部三千餘人

與同知蕭啟江分道來援時逆酋石達開與其黨賴裕新

劉武慎公全集卷首江撫奏摺二

九

黃玉崑等先後竄踞臨江瑞州等府廣東股匪破吉安府城僞豫王胡以眈踞袁州府城亦皆石逆死黨撫建官軍屢遭挫衄省城孤懸一日數警湘道梗阻文報久不相通劉長佑慷慨誓師眾爭告奮五月戰克萍鄉軍聲大振尋會克分宜其袁州府城賊勢益衰十一月朔遂克郡城踰月新喻亦克乃集清江新喻兩邑正紳辦理團練並設局轉餉俾進取無後顧虞七年二月師次清江太坪墟距臨江府三十里方將大舉羣賊屬至約爲互援楚軍數血戰眾寡輒不敵二十日賊大股分隊撲營死傷相繼並及幕僚藥彈且盡戰益不支劉長佑矢死不卻當陣引佩刀自

劉武慎公全集

卷首

主

裁時前兩江總督臣劉坤一充營務處強奪慰勉之始退次分宜適湖南餽饟藥至整軍復進賊列陣石崗鋪以待軍士憤恨激厲勇氣百倍賊悉敗回臨江郡城故寬廣賊重加高固急切不能得下六月瑞州府城已克遂調繼果營來以爲犄角八月撫州吉安援賊大至連營三十餘里劉長佑見事亟乃虛建旗幟壁中盡師出關環顧諸將曰今日非破敵無生矣大呼陷陣所向披靡遂北至黃岡賊皆獸散城賊援潰氣奪困以長濠遂克時十二月初九日也蓋自初攻至是凡八閱月當時有目擊者迄今每述其決盪乘勝之狀莫不感慨奮興而回念進深援絕經營竭

蹶之形神又未嘗不太息流涕也西路既通隨卹難民製守具通商除姦獎勵出力紳耆表揚節烈婦女民氣一新布置甫定卽東渡克新淦進規撫州屏蔽省垣是時逆氛猶熾戰事無虛月八年撫州建昌兩府相繼平定石逆在閩復糾崇安賊黨旁擾鉛山玉山廣豐諸縣省東再警劉長佑移軍新城瀘谿重扼杉關遏其回竄然後石逆望絕遠遁楚軍於是冬凱旋夫以三千餘卒當數十萬強寇奪還郡縣十有餘城拯民水火身屢瀕死而不顧卒致全省遂獲肅清其忠義勛烈實堪與左宗棠並傳不朽今哲人已逝遺愛難忘伏見有功於地方者皆得呈請建祠以伸

劉武慎公全集

卷首

主

奏建專祠等情前來臣伏查故臣左宗棠劉長佑立功江西偉烈奇勛皆有可考今因輿情愛戴呈請

奏乞

恩施相應據情上請合無仰懇

天恩俯準在江西省城建立已故大學士臣左宗棠已故雲貴

督臣劉長佑專祠春秋由地方官致祭列入祀典以順輿

情之處出自

聖主鴻施謹會同兩江督臣曾國荃合詞恭摺具

奏伏乞

皇太后

皇上聖鑒訓示謹

奏

光緒十四年四月十七日奉

旨著照所請該部知道欽此

劉武慎公全集

卷首

奏摺五

三

湖南巡撫臣王文韶跪

奏為已故大員功德在人鄉閭感慕懇請捐建專祠以順輿情恭摺仰祈

聖鑒事據湖南布政使孫翼謀詳據署新甯縣知縣張葆連詳據舉人鄧善源拔貢鄧家瑜等聯名呈稱已故原任雲貴總督劉長佑由道光己酉科拔貢出身效力戎行游陞兼圻當逆匪李沅發之變劉長佑與今乞養在籍之兩江總督劉坤一徒步赴府城告急一面糾集鄉兵先合城團殲除首逆撲滅餘黨是為立功名之始咸豐初同邑江忠源督師東下劉長佑參謀帷幄巡撫駱秉章知其忠勇檄帶

劉武慎公全集

卷首

三

楚軍轉戰各省五年率師回鄉值粵逆攻縣城七晝夜劉長佑方駐軍東安聞警星馳與賊遇於城東之石橋村發官鎗親冒矢石鏖戰瀕危卒能驅賊出境城賴以安九年粵匪石達開大股竄入楚境號稱百萬復從全州犯縣劉長佑自營城外東南嶺以固城根而以所部截擊於南鄉之新寨村大飄坪五里圳立發家財懸賞激勸將士旬日之間七獲大捷斬賊數千賊始不敢窺城復分兵守武岡援寶慶賊始竄走十年石逆分股由粵復竄縣境時劉長佑巡撫粵西諭縣無備督軍追至龍勝飭派糧國產鄧世堂兩營開道回援賊已先一日圍城旋經擊退縣中由此

高枕無憂後援勦各省歷膺疆寄

聖主酬庸至優極渥惟念劉長佑書生戎馬疊保孤城推其捍衛桑梓邑人咸感再生迄於歸田修書院創義田捐資興重經學其所以誘掖後進培養風俗爲士林師表仍與壯年講學時無異一朝怛化闔邑悲思念本邑江忠源與劉長佑同事江忠義鄧子垣皆出其門下或殉節城亡或積勞病故或臨陣捐軀均荷

特恩在本籍建立專祠春秋祭祀劉長佑雖時勢不侔而公忠

體

國之心則一可否援以爲例請於本籍建祠崇祀等情前來

劉武慎公全集

卷首

湘撫奏摺二

活

升任撫臣卞寶第未及核奏移交到臣覆查無異相應據情奏懇

天恩可否俯如所請於原任雲貴總督劉長佑原籍新甯縣地方準其捐建專祠春秋官爲致祭以昭忠蓋而順輿情出自

鴻慈理合恭摺具陳伏乞

皇太后

皇上聖鑒訓示謹奏

光緒十四年九月二十五日奉

硃批著照所請禮部知道欽此

湖南巡撫臣王文韶跪

奏爲已故大員有功原籍地方懇請援案建立專祠以順輿情恭摺仰祈

聖鑒事竊據在籍前兵部左侍郎郭嵩燾前山東巡撫陳士杰聯名呈稱竊惟捍災禦患歷時而事蹟常昭崇德報功奉祀而馨香永協仰惟

國家酬庸之典實治臣民感舊之忱原任雲貴總督劉長佑籍隸新甯以拔貢生隨同故安徽巡撫臣江忠源募勇馳援桂林省城時賊竄出粵境江忠源屢次攔頭截擊該故督實左右之其尤有功湖南大局在義衣渡一戰賊出全

劉武慎公全集

卷首

湘撫奏摺一

章

州劫擄民船蔽湘水而下江忠源卽馳赴永州上游之義衣渡伐巨竹及木株排截江路全力扼拒連槍伏岸擊之擲火彈燒賊船賊因捨船竄道州其時方在五月湘水大漲湖南省城正在折衝填築省垣使賊乘流下竄四五月可達城防竟無準備至今湘人歌誦不忘其功賊目蕭朝貴首先率數千人竄撲省城江忠源躡賊蹤追至相度天心閣地勢卽踞川立營蕭朝貴悉眾來爭江忠源截力堵擊該故督卽乘其時修築營壘踰時壘成遂其擊賊敗之踰日和春等營始次第至並倚天心閣營接續聯絡故論湖南守城之功江忠源與該故督爲最鉅咸豐五年江忠

源殉難廬州該故督護其喪歸新甯適廣東賊朱逢英陷東安該故督以東安新甯唇齒相依卽率所部遣歸之師馳擊之復其城賊聞道趨圍新甯知縣張士寬閉城力守該故督馳同擊賊圍始解時郴州久陷巡撫駱秉章檄該故督往援屢敗賊降賊首崔大光復其城九年石達開陷桂陽縣該故督適自江西率所部撤勇歸巡撫駱秉章卽飭以所部赴援賊連陷宜章興甯郴州桂陽州勢張甚該故督轉戰郴州之交旋躡賊祁陽道州再復東安城賊直趨寶慶該故督率所部追擊會賊出巒山該故督馳回新甯拒守又分軍援武岡因與諸軍合援寶慶擊石逆達開走之計該故督立功省分以江西廣西爲最多直隸雲南亦皆著有戰蹟惟此兩年中廣東賊及石達開大股竄擾郴桂永寶一帶該故督適歸轉戰奔馳未嘗稍息而勦賊必力躡賊必先所至撫循百姓畧無騷擾郴桂人民感之至深前經新甯原籍呈請建立專祠實因兩次保全縣城民心有不能忘其於省城及郴桂等處宜有春秋俎豆之報可否援案準於立功地方建立專祠由地方官春秋致祭在小民追思戰蹟事愈久而難忘知

聖人垂念勞臣

恩屢頒而不惜所有一應建祠經費由職等倡率紳民設法捐

劉武慎公全集

卷首 湘撫奏摺一

三

辦呈請具奏前來臣覆查無異相應據情奏懇天恩可否援案準予立功地方建立專祠由地方官春秋致祭以昭忠蓋而順輿情出自鴻慈理合恭摺具陳伏乞皇上聖鑒訓示謹

奏

光緒十五年十月十八日奉

旨著照所請該部知道欽此

劉武慎公全集

卷首 湘撫奏摺三

三